



mjesečni Bilten

omladinska mreža bosne i hercegovine

januar
siječanj
2017.

212

Dragi prijatelji/ce,

Predstavljamo vam januarsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **182** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u januaru 2017.	2
Planovi za februar 2017.	4
Mladi pišu.....	5
Aktivnosti članova mreže	6
Saopštenja/informacije/donatori/pozivi.....	19

Uživajte u čitanju!

AKTIVNOSTI ORC/HCA U JANUARU 2017.

„Ekipa iz komšiluka – poruka iz provincije“

Mapiranje „Crew from the hood“

Cilj projekta „Crew from the hood“ je izražen kroz motivaciju donosioca odluka za podsticanje aktivne suradnje alternativne kulture, afirmaciju i društveno priznanje za alternativnu kulturnu scenu. Projekat se fokusira na aktivnu alternativnu kulturnu scenu u tri regiona: istočna Bosna i Hercegovina, zapadna Srbija i sjeverna Crna Gora.

Tokom januara radili smo na uspostavi kontakata sa predstavnicima vlasti u Živinicama i Brčko Distriktu BiH, te prikupili bazu podataka mladih graffiti umjetnika iz Tuzle, Bijeljine, Živinica i Brčkog.

Radionica „Pisanje CV-a i motivacionog pisma“

11. januara u Tuzli, u organizaciji Edukativnog centra „Nahla“, održana je radionica, „Pisanje CV-a i motivacionog pisma“. Radionicu je održala Merita Sokoli, socijalna pedagoginja i članica Omladinske grupe ORC-a.

Edukativni centar Nahla ima za cilj osnaživanje žene obrazovanjem i kreiranjem poticajnog okruženja za lični razvoj i kompetentno učešće u društvenim procesima. U sklopu Edukativnog centra Nahla osnovan je Omladinski klub Nahla, a star je tek nekoliko mjeseci. Klub okuplja dvadesetak mladih djevojaka sa područja Tuzlanskog kantona. Cilj kluba jeste osnaživanje i jačanje djevojaka kroz edukativne sadržaje ovoga centra. Naredna predavanja će se odnositi na pozitivne životne vrijednosti, zahvalnost, verbalnu i neverbalnu komunikaciju, konkretnost i efikasnost u prezentovanju itd.

Omladinska grupa ORC Tuzla

Budi cool – postavi standard

Omladinska grupa Omladinskog resursnog centra Tuzla u januaru je implementirala projekat pod nazivom „Budi cool i postavi standard“. Aktivnosti ovog projekta su dvije radionice, gdje se prva realizovala u Tuzli u Kući plamena mira, a druga u Omladinskom centru Brčko distrikta BiH.

Na interaktivno – edukativnim radionicama edukatorica Merita Sokoli je radila sa učesnicima na temama: Samopouzdanje, bolesti ovisnosti, zdravi stilovi života i nenasilna komunikacija.

U sklopu ovih tema definirali su se pojmovi: samopouzdanje, samopoštovanje, bolesti ovisnosti, sredstva ovisnosti. Nakon definiranih pojmova učesnici su skupa radili na vježbama koje potiču razvijanje mehanizama odbrane, postavljanje granica, načine na koje se može reagovati ukoliko neko pređe



postavljene granice, uticaju zajednice u kojoj su živjeli i njen uticaj na ono što su postali danas, te prepoznavanju ovisničkih ponašanja i koliko takva ponašanja utiču na razaranje veza. U toku radionica učesnici su dosta polemicali i o pojmovima koji se koriste u društvu, a ne poznaje se njihovo pravo značenje.

U okviru zdravih stilova života dosta se razgovaralo o tome kakvu hranu svakodnevno jedemo, koliko vremena provodimo u prirodi, zašto se malo bavimo sportom, te na koji način trenutni način života koji vodimo utiče ne samo na trenutno stanje našeg organizma, nego i na stanje organizama u budućnosti. Učesnici su sa edukatoricom dosta govorili o stresnim situacijama s kojima se susreću i koje bolesti organizma, stres može uzrokovati. Edukatorica je kroz primjere iz prakse davala prijedloge na koji način mogu da utiču na smanjenje stresa i na koji način mogu ući u sukob sa drugim osobama, a da koriste vještine nenasilne komunikacije.



Ovom prilikom se zahvaljujemo donatoru - Institutu za razvoj mladih KULT, koji je u sklopu obuke "Uči misli i djeluj - (UMiD)" podržao projekat našeg omladinca i učesnika obuke Huseina Šljivića. Također se zahvaljujemo na podršci Centru za omladinski razvoj PRONI, te Omladinskom centru Brčko.

Banja Luka – Akademija za političko osnaživanje žena

Kao rezultat akademije održane u 4 grada Bosne i Hercegovine tokom oktobra 2016., Transparency International je u saradnji sa učesnicama izradio publikaciju, koja je bila prezentovana 26. 1.2017. godine u Banjaluci.



Ovo je bila posljednja aktivnost na kojoj su učestvovalе sve djevojke koje su prošle akademiju. Omladinsku grupu ORC Tuzla predstavljala je Marija Jokić. Učesnice su prvo imale priliku posjetiti Gender centar RS, gdje se pričalo o radu i problemima s kojima se susreće jedna ovakva institucija. Učesnice su saznale koliko je ovaj centar priznat i legitiman u svim nivoima vlasti RS-a, i koliko su podaci ovog centra bitni za realnu sliku političkog života u BiH. Naredna posjeta je bila instituciji Ombudsmana, gdje se razgovaralo o organiziranosti ove institucije i njenoj ulozi u svakodnevnom funkcioniranju naše države. Posljednja aktivnost i zaključak svih predhodnih je prezentacija priručnika. Priručnik je sastavljen od radova koje su pisale djevojke koje su učestvovalе na akademiji. Tema radova je bila i tema same akademije.

Redovne aktivnosti ORC i hCa Tuzla:

Tokom januara radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte, te priprema izveštaja za projekte i prethodnog perioda.

PLANOVI HCA/ORC-A ZA FEBRUAR 2017.

- Sprovođenje redovnih aktivnosti kroz Omladinsku mrežu BiH;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Pripreme za organizovanje godišnjeg sastanka ALF mreže BiH;
- Nastavak aktivnosti na partnerskom projektu „Crew from the hood – Messages from province“, sa partnerima iz Srbije (Forum građanske akcije – FORCA Požega) i Crne Gore (NGO Fenomeni Kolašin).
- Učešće na trećoj regionalnoj konferenciji o ljudskoj sigurnosti u Atini, Grčka, 23. – 25. Februar 2017., u okviru partnerskog projekta „Prekogranična građanska mreža za mir, pomirenje i sigurnost ljudi na Balkanu.“

Mladi pišu

Merita Sokoli: Znali su mi reći kako džaba radim, da nemam ništa od toga, kako su volonteri sektaši



Kada mi neko spomene volonterizam odmah se sjetim svih mladih koje sam upoznala, gradova i država koje sam obišla, učenja koje je bilo zabavno i svih ostalih avantura koje su me učinile sretnom. Bilo mi je puno toga neobičnoga u svijetu volontera, počevši od seminara i treninga gdje edukatori kažu da možeš pitati sve što želiš, da nema glupih pitanja, da je sasvim uredu ako se ne slažem sa mišljenjima drugih, i gdje ti naprave ambijent da se osjećaš slobodno i opušteno.

Kada uđete u svijet volonterizma zavoljeti ćete ga. Prilike koje se pružaju, vještine koje usvojite, znanje koje dobijete s tim da se i dobro zabavite je neprocjenljivo. Nema toga novca kojim se može platiti sve ono što sam dobila baveći se volonterizmom. Često su mi znali reći kako džaba radim, da nemam ništa od volontiranja, kako su volonteri sektaši, ali naravno da me te riječi nisu obeshrabrile. U svojoj priči o volonterizmu, aktivizmu i omladinskom radu najviše sam ja profitirala. Zahvaljujući seminarima, treninzima i edukacijama koje sam prošla, danas imam priliku da radim sa mladim ljudima na koje prenosim znanja i vještine koje znatno utiču na pozitivne promjene u njihovim svakodnevnica.



Postoji definicija volonterizma, no nama omladincima, volonterima i aktivistima je valjda dozvoljeno da budemo drugačiji i da kreiramo svoje definicije, pa ću vam i ja napisati svoju „Volonterizam je puno više od pomaganja drugima, volonterizam je zapravo učenje da pomažeš i usrećuješ sebe, ali i sve druge“.

Ukoliko želite da učite, da upoznate druge mlade ljude, da iznesete svoje stavove, putujete i radite na sebi, izađite iz odijela i uskočite u cipele volontera.

AKTIVNOSTI ČLANICA OMLADINSKE MREŽE BiH



BOŠNJAČKI INSTITUT
Fondacija Adila Zulfikarpašića

BOŠNJAČKI INSTITUT – Fondacija Adila
Zulfikarpašića

Ul. Mula Mustafe Bašeskije 21, 71 000 Sarajevo
Tel.: +387 33 279 805; Fax: +387 33 279 763
E-mail: narcisap@bosnjackiinstitut.ba
Web: www.bosnjackiinstitut.ba

Idemo u muzej!

Osam priča o znanju i kreativnosti

I u 2016. godini Bošnjački institut posvetio je dio svojih kulturnih i naučnih aktivnosti mladima da iskažu svoju kreativnost i da u saradnji sa muzejima i galerijama učestvuju u unapređenju kulture svoje lokalne zajednice.

Projekat *Idemo u muzej!* okupio je učenike i učenice srednjih škola sa područja Općine Stari grad Sarajevo, Gazi Husrev-begove medrese, Prve bošnjačke gimnazije, Srednje muzičke škole, Srednje škole poljoprivrede, prehrane, veterine i uslužnih djelatnosti Sarajevo, Srednje ugostiteljsko – turističke škole i Srednje škole za tekstil, kožu i dizajn.



Učenici i učenice posjetili su **8** kulturnih institucija i historijskih lokaliteta na području Općine, te su učestvovali u **7 edukativno-kreativnih** radionica, koje su bile posvećene različitim temama kulture i historije, *Arheološka otkrića* na Bijeloj tabiji, *Sevdah – naslijeđe i muzički pravac* u Art Kući sevdaha, *Naslijeđe Sarajeva* u Brusa bezistanu – Muzeju Sarajeva, *Sefardska kultura u Bosni i Hercegovini* u Muzeju Jevreja – Muzeju Sarajeva, *Kultura življenja i stambena arhitektura* u Svrzinoj kući – Muzeju Sarajeva, *Restauracija pisanog naslijeđa* u Gazi Husrev-begovoj biblioteci, *Moderna umjetnost* u

Umjetničkoj galeriji Bosne i Hercegovine i *Promocija i afirmacija bh. kulturnog naslijeđa* u Bošnjačkom institutu – Fondaciji Adila Zulfikarpašića.

Svaka radionica i posjeta popraćena je strip pričom, koje su zajednički izradili učesnici/ice radionica i najznačajniji strip crtač u Bosni i Hercegovini, Filip Andronik.

Tokom zajedničkog druženja kroz edukaciju, razgovore i interaktivni rad u grupama, kreirana je kulturna ruta Općine Stari grad, koja obuhvaća najznačajnije institucije i lokalitete bosanskohercegovačke kulture i naslijeđa.

Kroz druženja i edukaciju preko 180 učenika i učenica pružilo je doprinos u promoviranju i populariziranju kulturno-historijskog naslijeđa svoje lokalne zajednice. Zajednički rezultati promovirani su na izložbi *Idemo u muzej!* na kojoj su predstavljeni etnološki i historijski eksponati posjećenih muzeja i biblioteka, kulturna ruta Općine Stari grad, strip priče i brošura projekta.

Projekat je implementirao Bošnjački institut – Fondacija Adila Zulfikarpašića, a pod pokroviteljstvom Općine Stari grad Sarajevo u periodu od 8 mjeseci, od maja do decembra 2016. godine.



Anesa Hidić, član Omladinske mreže, pojedinac

Omladinski krug Kladanj

E-mail: anesahidic@hotmail.com

Skijajmo za domovinu



Dana 22.01.2017. godine, je na stazama ski lifta Karaula, koji već drugu sedmicu funkcioniše u punom kapacitetu, u organizaciji BZK „Preporod“ Kladanj održana jemanifestacija „Zimske radosti u domovini“.

Manifestacija nosi simboličan naziv „Skijajmo za domovinu“, za našu Bosnu i Hercegovinu, u okviru koje je organizovano takmičenje u skijanju, zajednički ručak i druženje na snijegu. Raduje me činjenica da je manifestaciju podržao veliki broj građana sa područja TK. Tehničku podršku u realizaciji projekta pružio nam je Ski klub „Kladanj“- kazala je Nevzeta Rustemović, predsjednica BZK Preporod.

Manifestaciju koja je okupila veliki broj građana podržali su Ministarstvo za ljudska prava i izbjeglice BiH, Turistička zajednica TK i Općina Kladanj.

Dobrovoljno darivanje krvi

Dana 18.01.2017.godine, u prostorijama JZU Dom zdravlja Kladanj, organizacija Crveni križ općine Kladanj, u saradnji sa Poliklinikom za transfuziologiju UKC-a Tuzla organizovala je redovnu akciju dobrovoljnog darivanja krvi.

Ni snijeg i hladno vrijeme nisu spriječili veliki broj dobrovoljnih davaoca krvi sa područja cijele općine Kladanj da se odazovu akciji kojoj se i ovog puta odazvao veliki broj mladih sugrađana.



Održana humanitarna akcija



Dana 15.01.2017. godine u Kladnju, u organizaciji Udruženja ginekologa i perinatologa Tuzlanskog kantona i Klinike za ginekologiju i akušerstvo UKC Tuzla, povodom obilježavanja Evropske sedmice prevencije raka grlića materice, održana je humanitarna akcija.

Učešće u ovom projektu uzeli su i studenti Medicinskog fakulteta Univerziteta u Tuzli, koji su na info pultu koji je bio postavljen u trgovačkom centru Bingo u Kladnju vršili edukaciju o važnosti redovnih ginekoloških kontrola, kao preventivne mjere u sprečavanju nastanka ove teške maligne bolesti.



Međunarodni centar za djecu i omladinu FORTIS

Ul. Suljo Čilić bb, 88420 Jablanica
Tel./fax: +387 63 334 993, +387 61 327 427
E-mail: centarfortis@yahoo.com
Web: www.centar-fortis.org

Zajednički projekat između ADRA BiH i Međunarodnog centra za djecu i omladinu „Fortis“ nastavlja se i ove, pete godine po redu. Pomogli smo mnogima, uspješno darovali i postali tim putem sretniji.

Od 5.575 paketa koji su iz Baden-Württemberga pristigli u Bosnu i Hercegovinu, podijeljeno je njih ukupno 200 na području općine Jablanica i grada Mostara. Paketići koji su došli iz Savezne Republike Njemačke se pakuju tokom cijele godine u školama i dječijim vrtićima i namijenjena su upravo djeci sa Balkana.

U općini Jablanica paketići su podijeljeni članovima Centra „Fortis“ i učenicima Male škole klavira, učenicima i polaznicima u „Dnevnom centru“ zajedno sa Omladinskim klubom „Pod istim suncem“, dok su paketići u Mostaru podijeljeni dječici iz vrtića „Zemzem“ iz Vrapčića, „Dječijem domu“ za djecu bez roditeljskog staranja i socijalno ugroženo djeci sa područja cijelog grada Mostara.



U našem kantonu, Hercegovačko-neretvanskom kantonu, u našoj Federaciji Bosni i Hercegovini i cijeloj Bosni i Hercegovini ima i postoji niz porodica kojima su krila pomoći dobrodošla i čija djeca nemaju najbolji uređaj današnje tehnologije. Danas je potrebno živjeti u miru, slobodi, veselju u radosti a svako dijete, dolazilo iz bolje stojeće ili manje stojeće porodice, imalo je isti osmijeh i istu iskru u očima kada je dobijalo paketić. I Amina i Sabina i Ana i Elma i Džan i Gaš i Elmas i Amar, i Leona i Sanda, i Suada i Magdalena, i Nađa i Jasmina i David i Riad i Sara i Giorgia, svi su oni tog momenta bili isti. Svi su izgovarali istu rečenicu: „Ovo mi je najsretniji dan u životu“.

Poruka ovog zajedničkog projekta jeste u tome da se uvažavaju različitosti među djecom svijeta, da te razlike ne postanu prepreke, već da djeca uprkos tim različitostima mogu da postignu jedinstvo, gdje niti jedno dijete neće biti diskriminisano.

Sretnu i uspješnu radnu Novu 2017. godinu želi Međunarodni centar za djecu i omladinu „Fortis“ iz Jablanice.



Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: +387 33 778 778; Fax: +387 33 778 779

Web: www.mladi.org

U KS nezaposleno oko 50% mladih, a u školskim klupama sve je manje đaka

Oko 50% mladih u Kantonu Sarajevo je nezaposleno, pokazali su rezultati Analize o položaju i potrebama mladih u ovom kantonu, a koju je u saradnji sa Ministarstvom za obrazovanje, nauku i mlade KS radio Institut za razvoj mladih KULT.



Rezultati Analize, koji su predstavljani u prostorijama ministarstva 24. januara 2017. godine, pokazuju i da je svaka sedma osoba iz ove populacije zaposlena, te da taj podatak dovodi do zaključka da je među ukupnim brojem zaposlenih u KS tek 13% mladih.

„Ovakve rezultate Analize mogli smo očekivati, ali ono što je i nas iznenadilo, a što trebamo shvatiti krajnje ozbiljno, podatak je da je samo u posljednje dvije godine broj srednjoškolaca manji za 23%. Čini se da smanjenje nataliteta dolazi na naplatu i krajnje je vrijeme da se probudimo i

počnemo ozbiljno raditi na poboljšanju cjelokupnog ambijenta za mlade u Bosni i Hercegovini.“ – poručila je Katarina Vučković iz Instituta za razvoj mladih KULT.

Rezultati ovog istraživanja predstavljaju osnovu i prvi korak u izradi Strategije prema mladima Kantona Sarajevo.

Kako je poručio resorni ministar Elvir Kazazović, radna grupa za izradu Strategije već je formirana i ubrzo bi trebala početi i sa radom. Strategija će biti zasnovana na realnim i lako provodljivim ciljevima, a ministarstvo će uz izradu strateškog dokumenta, kako bi poboljšalo položaj mladih, raditi i na izdvajanju budžetskih sredstava za pomoć mladima, te regulisanju njihovog statusa kroz zakone.

Kako pokazuju rezultati istraživanja, mladi su nezadovoljni obrazovanjem, najviše zbog nedostatka praktične nastave, nedostatkom poticaja za pokretanje biznisa, nemogućnošću da zasnuju vlastitu porodicu, te zbog nekvalitetno provedenog slobodnog vremena.

Najveći problem, kako je pokazala Analiza, predstavlja to što bi oko 37 posto mladih otišlo u inostranstvo zauvijek, 34 posto mladih bi otišlo na duži period kada bi im se za to pružila prilika, a 18 posto mladih već je poduzelo konkretne korake za odlazak iz zemlje.

Naročito je zabrinjavajuće da oko 7 posto mladih sedmično posjećuje kladionice, 6 posto ih to radi tri do pet puta sedmično, a 3 svaki dan. Ti podaci pokazuju da sve veći broj mladih postaje ovisno o kockanju, navedeno je između ostalog u Analizi potreba i problema mladih.

U ovom istraživanju prvi put je sprovedeno ispitivanje o sigurnosti mladih gdje je utvrđeno da je najzastupljeniji oblik nasilja kod mladih međuvršnjačko nasilje, pa tek onda drugi vidovi nasilja poput psihičkog, fizičkog i nasilja u porodici.


Istraživanje je provedeno na području Kantona Sarajevo u periodu juni –august 2016. godine, anketirano je 777 ispitanika u dobi od 15 do 30 godina i uzorak sadrži približno jednak broj muškaraca i žena, jednak broj mladih iz gradskih i vangradskih sredina, a potrebna pažnja posvećena je i drugim značajnim demografskim karakteristikama.

Analiza je dostupna na linku: <http://mladi.org/url/ch>

Stotine građana i građanki poslalo poruke bh. vlastima

„Dajte nam posao“, „Stop korupciji i nepotizmu“, „Zaustavite odliv mozgova“, najčešće su poruke koje su građani i građanke danas poslali predstavnicima bh. vlasti.

Poruke ispisane na posebno dizajniranim razglednicama, s crtežima koji šalju snažne poruke o gorućim problemima prosječnog bh. građanina/ke, prvenstveno nagomilanih u oblasti privrede, danas je predstavnicima vlasti uputilo nekoliko stotina građana.



Akciju ispisivanja i slanja razglednica ispred sarajevske katedrale Srca Isusova 23. januara 2017. godine organizovao je Institut za razvoj mladih KULT, kako bi omogućio da se čuje glas građana i građanki.

„Svjesni smo da na ovaj način ne možemo riješiti probleme bh. građana/ki, ali smo uvjereni da možemo pokrenuti neka vrlo značajna pitanja. Građani/ke koji su danas uputili poruke mogu biti sigurni da će one doći do onih kojima su namijenjene. Bh. vlasti moraju slušati šta im imaju reći oni koji za njih glasaju, ali i raditi na rješavanju nagomilanih problema.“ – poručila je Nejra Neimarlija Roić iz Instituta za razvoj mladih KULT.

Građani/ke bili su vrlo transparentni prilikom slanja poruka, a mnogi od njih poruke su završavali ličnim potpisom.

„Nema više vremena za čekanje. Ako bh. političari budu još čekali da nešto poduzmu, za njih više neće imati ko glasati. Svi nam odoše.“ – istakao je jedan od građana.

Institut za razvoj mladih KULT akciju je organizovao u okviru inicijative Poslovni prostor BH koja je pokrenuta s ciljem davanja doprinosa rješavanju sistemskih problema u sektoru zapošljavanja u BiH, prije svega neadekvatnom sistemu raspodjele budžetskih poticaja za programe i aktivne mjere suzbijanja nezaposlenosti u BiH, te opterećenosti privrede lošim konceptom naplate poreza i visokim doprinosima na plaće radnika, što sputava ulaganja u razvoj i otvaranje novih radnih mjesta.

Lokalnim građanskim inicijativama do obrazovanih i odgovornih mladih

Neformalno obrazovanje ključ je napredovanja mladih u BiH, a Institut za razvoj mladih KULT podržao je Lokalne građanske inicijative u nekoliko bh. sredina koje za cilj imaju omogućiti mladima sticanje novih znanja.

Cilj Instituta i organizacija sa kojima realizuje Lokalne građanske inicijative, jeste potaći aktivizam mladih kojim nedostaje više prostora za korisno organizavanje slobodnog vremena, te ih učiniti korisnim građanima/kama društva.

U Zavidovićima je tako pokrenuta inicijativa „Želim učiti i van škole“ u okviru koje će biti organizovane radionice za mlade o neformalnom obrazovanju i mobilnosti. Radionice će u prostorijama JU „Gimnazija Rizah Odžekić“ pohađati mladi iz Zavidovića, Žepča i Zenice, inicijativu realizuje Ambasada lokalne demokratije.

Najveći problem mladih u Doboju, kao i u većini drugih bh. sredina, je nezaposlenost. Nedostaje radnih mjesta zbog čega se mladi najčešće odlučuju napustiti zemlju i osigurati egzistenciju negdje drugo.

Kako bi spriječili odlazak mladih iz ove lokalne zajednice, članovi H.O. „Merhamet“ odlučili su mladima organizovati obuke koje će im omogućiti pokretanje vlastitog biznisa. U okviru inicijative „Perla“, desetero nezaposlenih mladih dobit će priliku da završi obuku izrade nakita, a nakon toga će im biti osigurani i osnovni materijali za pokretanje i razvoj biznisa.

Omladinska grupa Omladinskog resursnog centra Tuzla za mlade iz Tuzle i Brčko Distrikta nešto korisno odlučila je učiniti kroz inicijativu „Budi cool i postavi standard“. U Tuzli je za četrnaest mladih osoba već organizovana radionica u okviru koje su se mladi imali priliku upoznati sa problemom bolesti ovisnosti i zdravom načinu života, dok će u Brčkom biti održana sredinom januara.

Mladima je na ovaj način pružena prilika da kroz pisanje pjesme, crtanje crteža i glumu, na kreativan način spoznaju koliko zdravi stilovi života mogu biti Cool.

Mladi aktivisti/ce iz Prijedora odlučili su da fokus njihove inicijative bude na seksualnom i reproduktivnom zdravlju jer je riječ o oblasti kojoj se u bh. društvu ne pridaje dovoljno značaja. Humanitarno udruženje „Čisto srce“, u okviru svoje Lokalne građanske inicijative "Znanjem protiv HIV-a" obilježili su Međunarodni dan borbe protiv HIV/AIDS-a. Organizovali su uličnu akciju tokom koje su dijelili edukativne materijale i prezervative. Cilj je bio utjecati na svijest mladih o ovoj bolesti, ali i načinima prevencije.

Sve aktivnosti koje se realizuju u okviru Lokalnih građanskih inicijativa vode polaznici/e obuke „Uči, misli i djeluj!“ koju organizuje Institut za razvoj mladih KULT, a koja za cilj ima omogućiti mladima sticanje znanja i vještina koja će im osigurati konkurentnost na tržištu rada.





H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Dobož

Tel./fax: +387 53 226 886

E-mail: merhamet.doboj@cutuk.net

FB: www.facebook.com/Merhamet-Doboj

Aktivnosti H.O. „Merhamet“ Dobož u januaru 2017.

Volonterka "Merhameta" Semra Jašarević i volonterka omladinske organizacije "Šestog čulo", Elvira Mahmutović implementiraju projekat "Perla" - izrada nakita. Donator ovog projekta je "Kult" organizacija.



Održan je i prvi sastanak mreže "Tolerantno i pozitivno" iz Doboža. Na sastanku je donesen plan aktivnosti za 2017. godinu.



Zbog praznika i planiranja aktivnosti za naredne mjesec u Novoj godini, nismo imali aktivnosti kao i inače. Srdačan pozdrav od Merhameta!



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je u januaru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinatorica jutarnjih radionica je pripremila plan aktivnosti na temu tolerancija, prijateljstvo i ljubav, te zadatke za rad u grupi. Svake srijede su slušali i vježbali razne dječije pjesmice namijenjene njihovom uzrastu, kako bi na taj način vježbali ritmiku i polako usvajali tekst. Budući da skoro svake sedmice dođe novi član, grupa svakog četvrtka vježba i ponavlja već naučene brojeve, koristeći radne listove za bojenje, te ponavlja oblike i boje na engleskom i njemačkom. Materijali koji su se koristili za realizaciju ovih radionica su voštane boje, flomasteri, drvene i vodene bojice, kolaž i krep papir, drvo, karton, plastika, perje i blokovi za crtanje. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U januaru je do 20 učesnika pohađalo jutarnje dnevne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).



Ponedjeljkom su radionice kreativnog izražavanja, utorkom engleski jezik, komunikacija, izgovor, te razne igre koje pospješuju učenje stranog jezika u grupi. Grupa je i ovaj mjesec, pored gramatičkih zadataka, vježbala komunikaciju na engleskom jeziku, te su usvajali novi vokabular. Srijeda je dan za muziku i pjevanje, učenje osnova na muzičkim instrumentima gitari i klaviru, uključujući teoriju muzike za početnike i čitanje nota. Svakog četvrtka starija grupa je podijeljena u dvije manje i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom su radionice njemačkog jezika kao i dan za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u januaru je bila Milica Baćanov, uz asistenciju lokalnih i Weltwaerts i EVS međunarodnih volontera Alexandera Likica iz Njemačke, Bonnie Sturgess iz Australije, Mahmuta Taha Bicera i Yunusa Seckina iz Turske, Eduarda

Altube iz Argentine, te Monice Reeves, Eleonore Pearson i Bena Owensa iz Velike Britanije. Broj učesnika starije grupe je trenutno između 15 i 20 učesnika.

„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova. Grupa trenutno radi na gramatici za početni i srednji stepen i obrađuje teme iz svakodnevnog života. Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. U januaru je grupa radila na tekstovima prilagođenim njihovom znanju, te su vježbali prošlo gramatičko vrijeme. Koordinator projekta je međunarodni volonter iz Njemačke Alexander Likic. Radionice je u januaru pohađalo 10 učesnika (dvije grupe).

„I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. U januaru su učesnici radionica realizovali tri interaktivne radionice na kojima su učesnici pokazali usvojena znanja. Koordinator projekta je međunarodna volonterka iz Velike Britanije Monica Reeves. Radionice je u januaru pohađalo 10 učesnika.

„Love Art?“ – radionice kreativnog izražavanja za uzrast 16+

Radionice kreativnog izražavanja se održavaju svakog utorka u prostorijama Omladinskog centra Brčko distrikt od 19:00-20:00 časova. Ove radionice, koje su počele u novembru su namijenjene za sve koji vole umjetnost i istoriju umjetnosti, te crtanje, slikanje i druženje uz diskusiju. Učesnici su nastavili da rade na temi surealizam, crtanje portreta i kolaž. Koordinator projekta je međunarodna volonterka iz Velike Britanije, Eleonore Pearson. Radionice je u januaru pohađalo 5 učesnika.

Radionice gitare

Učesnici radionice gitare u januaru su nastavili uvježbavati etide i kompozicije Rolanda Dyensa, Carla Domeniconija, Franciska Tarrrege, Fernanda Sora, kao i duete Francisa Kleynjansa i Johna Dowlanda. Novi polaznici su se nastavili upoznavati sa osnovama instrumenta.

Radionice sambe

Od januara radionicama prisustvuju novi učesnici i novi volonteri iz Velike Britanije i Turske. Grupa je većinom radila na već rađenim kompozicijama pri čemu su stalni polaznici upoznavali nove sa vještinama koje su stekli u prethodnom periodu.

„Freeletics“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator projekta je Miloš Popić.



Za februar se planira nastavak svih redovnih radionica Omladinske organizacije Svitac.





Omladinski centar za kreativnost i inicijativu – OCKI

Ul. Donje Vodičevo bb, 79220 Novi Grad

Tel: +387 52 751 020

E mail: info@ocki.info, helena.kreca@gmail.com, dijana@ocki.info

Web: www.ocki.info

Facebook: www.facebook.com/ocki.donjevodicevo

Uspješno završena humanitarna akcija „Jedan slatkiš – jedno dijete“

U toku decembra 2016. godine OCKI – Omladinski centar za kreativnost i inicijativu iz Novog Grada, zajedno sa Udruženjem djece i omladine sa posebnim potrebama i njihovih roditelja "Iskra" i Udruženjem porodica sa četvoro i više djece "Sara", uspješno je organizovao Humanitarnu akciju pod nazivom "Jedan slatkiš – jedno dijete".

Primarni cilj ove akcije je bio da se prikupe slatkiši, igračke i školski pribor koji će se u novogodišnjim paketićima darovati djeci sa posebnim potrebama i djeci iz socijalno ugroženih porodica sa četvoro i više djece. Početno očekivanje je bilo da će se kroz akciju formirati najmanje 100 novogodišnjih paketića.



Ponosno možemo reći da smo veoma zadovoljni realizacijom akcije i da je u toku nje prikupljen materijal i formirana su 122 novogodišnja paketića, koji su 30. decembra u 12:00 časova, uz prigodnu predstavu u izvođenju Teatra „Scena“, podijeljeni djeci u prostorijama Udruženja „Iskra“.



Kutije za prikupljanje slatkiša su bile postavljene u objektima nekoliko poslovnih subjekata.

Jedna kutija je svakodnevno bila postavljena na štandu u glavnoj gradskoj ulici, na kojem su dežurali volonteri OCKI-a.

Pored kutija, bio je postavljen i određen broj kasicica za prikupljanje novčanih priloga za nabavku igračaka i školskog pribora za ovu djecu te jedna kasicica na štandu u glavnoj ulici.

Ovom prilikom se zahvaljujemo svim poslovnim subjektima koji su odobrili postavljanje kutija za slatkiše i kasicice za novčane priloge, jer su na ovaj način pomogli da djeca sa invaliditetom i djeca iz socijalno ugroženih porodica sa četvoro i više djece dobiju novogodišnje paketiće. Najviše se, ipak, zahvaljujemo građanima koji su pokazali humanost i bez čijih materijalnih i novčanih priloga ovu akciju ne bi bilo moguće realizovati. Humanitarnu akciju medijski je podržao Radio Novi Grad, kojima se zahvaljujemo što su propratili sve aktivnosti i promovisali ih u svom programu, te su na taj način značajno doprinijeli uspješnosti akcije.



U ovoj humanitarnoj akciji je učestvovalo 12 volontera, sa realizovanih 112 volonterskih sati, kojima se posebno zahvaljujemo na uloženom trudu i vremenu i želji da po ovim hladnim danima nesebično pomognu drugima. Volonteri su unešeni u republičku bazu volontera koju vodi Volonterski servis Republike Srpske, a njihov volonterski angažman je evidentiran njihovim volonterskim knjižicama.





VIJEĆE MLADIH FEDERACIJE BOSNE I HERCEGOVINE

4. viteške brigade 34-36, Ilidza Tel./Fax: +387 33 778-770

E-mail: vmfbih@gmail.com

Web: www.vijecemladih.ba

Vijeće mladih Federacije Bosne i Hercegovine je u saradnji sa Omladinskim savjetom Republike Srpske potpisalo sporazum o provođenju procesa izbora osobe iz omladinskog sektora za člana/icu u Upravnom odboru RYCO-a. Prema tom Sporazumu ove dvije organizacije su imenovale i formirale Komisiju koja je vodila proces izbora osobe iz omladinskog sektora u Bosni i Hercegovini.

Ispred Vijeća mladih Federacije Bosne i Hercegovine, tri osobe iz Upravnog odbora su bile dio ove Komisije. Određeni su kriteriji prema kojima se boduju kandidati/kinje, te je formulisan tekst Javnog poziva.

Javni poziv je objavljen na web stranicama Vijeća mladih FBiH i Omladinskog savjeta RS, te je isti bio otvoren 8 dana. Prijave su se slale elektronskim putem. Nakon zatvaranja Javnog poziva organizovali smo intervju sa kandidatima/kinjama. Prema mišljenju i bodovima Komisije, predstavnica omladinskog sektora iz Bosne i Hercegovine je izabrana Danijela Topić. Sama odluka i proces koji smo vodili od potpisivanja do izbora smo predali Vijeću ministara koji su izvršili imenovanje Danijele Topić.



U narednom mjesecu planirano je da se održi sastanak Upravnog odbora Vijeća mladih FBiH sa tekućim pitanjima.

SAOPŠTENJA/INFORMACIJE/DONATORI/ POZIVI

PeaceNexus Foundation objavljuje poziv za 2017., za podršku organizacionom razvoju

PeaceNexus fondacija, bazirana u Švicarskoj, podržava procese organizacionih promjena organizacija civilnog društva i internacionalnih nevladinih organizacija sa mandatom izgradnje mira još od 2009. godine.

Aplikacija zahtijeva opis organizacionog izazova, a kako bi prevazilaženje istog dovelo do više uticaja na izgradnju mira. OCD iz određenih zemalja zapadnog Balkana, Centralne Azije i zapadne Afrike mogu aplicirati, kao i međunarodne nevladine organizacije. Krajnji rok za prijavu je 14. februar.

Sveobuhvatan opis onoga što PeaceNexus podrške organizacijskom razvoju podrazumijeva, uključujući i primjere onoga što je omogućilo organizacijama za izgradnju mira da ostvare, može se naći na engleskom i francuskom jeziku na [PeaceNexus' website](#). Molimo vas da tamo pogledate proceduru i dokumente uključujući najčešća pitanja.

Globalna anketa o miru i sigurnosti mladih

Rezolucija Vijeća sigurnosti UN-a 2250, koja je usvojena u decembru 2015. godine, nalaže studija o napretku mladih, miru i sigurnosti, signalizirajući potrebu za povećanjem informacija o zajednici mladih graditelja mira. Gdje mladi ljudi rade na miru i sigurnosti, i šta rade? Kakav uticaj su mladi ljudi imali na mir i sigurnost i šta je njihova vizija budućnosti?

[United Network of Young Peacebuilders](#) zajedno sa [Search for Common Ground](#) provodi globalno istraživanje za omladinske organizacije koje rade na pomirenju, kako bi dali doprinos Studiji o napretku mira i sigurnosti za mlade.

Ako ste aktivni sa mladima na čelu mirovne organizacije ili inicijative, učestvujte u:

- uticanju na budućnost učešća mladih u miru i sigurnosti i da se vaš glas čuje u Studiji o napretku mladih, mir i sigurnost.
- Istaknite svoj rad na miru i sigurnosti globalnoj publici.
- Postanite dio globalne baze podataka organizacija i inicijativa, pružajući više mogućnosti za saradnju sa drugima

Neka se vaš glas čuje, popunite anketu na: <https://www.youth4peace.info/Survey>



Dopuna poziva – Natječaj za dodjelu sredstava: Potpora udruženjima civilnog društva

Tijekom 2015. godine mreža 16 partnerskih organizacija u Jugoistočnoj Europi, predvođena Caritasom Srbije, započela je provođenje projekta pod nazivom SOCIETIES – *Support Of CSOs In Empowering Technical skills, Inclusion of people with disabilities and Eu standards in South east europe* (Potpora udrugama civilnog društva u osnaživanju tehničkih vještina, socijalnom uključivanju osoba s teškoćama u razvoju i u primjeni standarda EU u Jugoistočnoj Europi). Projekt je odobren u okviru natječaja EU za podršku radu civilnog društva i medija, s općim ciljem jačanja participativne demokracije i procesa EU integracija Zapadnog Balkana i Turske kroz osnaživanje organizacija civilnog društva (OCD) kako bi aktivno sudjelovali u donošenju odluka, te stvaranjem pravnog i financijskog okruženja za djelovanje civilnog društva i participativnih medija. Krajnji cilj je jačanje njihovih kapaciteta za zastupanje i učinkovitiji dijalog s vladama kako bi se utjecalo na politiku i procese donošenja odluka, te za stvaranje trajne promjene u društvu. Projekt je započeo 1. siječnja 2016. i trajat će 48 mjeseci, do konca 2019. godine, a u Bosni i Hercegovini se provodi u suradnji s Udruženjem za uzajamnu pomoć u duševnoj nevolji TK „Fenix“, uz podršku Federalnog ministarstva zdravstva, Ministarstva zdravlja i socijalne zaštite RS, te Centra za mentalno zdravlje Vitez.

Ciljevi projekta

Projekt “SOCIETIES” je akcija predložena od strane saveza za socijalno uključivanje sastavljenog od 16 OCD-a na Europskoj razini. Projekt provodi 7 članica Caritasove mreže i 9 OCD-a koje rade na području socijalnog uključivanja osoba s invaliditetom (OSI) u Srbiji, Kosovu*, Bosni i Hercegovini, Crnoj Gori i Albaniji. Pored toga, Italija i Bugarska nude stručnu pomoć u prijelaznim i de-institucionalnim procesima kao zemlje članice EU.

Svrha projekta je osnažiti organizacije civilnog društva za sudjelovanje u javnoj raspravi i dijalogu s vlastima, povećavajući njihovu stručnost i znanje kako bi: utjecali na procese u donošenju odluka, te unaprijedili i promicali politike socijalnog uključivanja.

Specifični ciljevi projekta

1. Jačanje sposobnosti udruga civilnog društva u promicanju socijalne uključenosti osoba s invaliditetom i mentalnim poremećajima: izgradnja kapaciteta, razmjena znanja, regionalna mreža, vođenje inicijativa socijalnog uključivanja i usluga, praćenje i evaluacija socijalnog utjecaja.
2. Poticanje kapaciteta organizacija civilnog društva na dijalog s tijelima vlasti nadležnima za socijalnu uključenost: strateško i komunikacijsko planiranje, zagovaranja, lokalna umrežavanja, sudjelovanje u procesima donošenja odluka.

Ciljevi natječaja

Cilj natječaja je podržati i povećati broj socijalnih usluga u zajednici i broj socijalnih poduzeća, kojima upravljaju OCD, čime se potiče socijalna uključenost osoba s invaliditetom (OSI) i osoba s mentalnim poteškoćama.

Otvora se 5 poziva za prijavu projekata (1 za svaku IPA zemlju).

Prihvatljivi prijavitelji – TKO SE MOŽE PRIJAVITI

Natječaj je otvoren za lokalne organizacije civilnog društva koje isključivo rade s osobama s invaliditetom i/ili osobama s mentalnim poteškoćama. U svrhu prihvatljivosti za ovaj natječaj, prijavitelj treba biti:

- pravna osoba;
- neprofitna organizacija

- lokalna OCD koja radi s osobama s invaliditetom i / ili osobama s poteškoćama mentalnog zdravlja;
- osnovan u Bosni i Hercegovini;
- izravno odgovorna za pripremu i upravljanje predloženim projektom.

Prihvatljive aktivnosti

Podrška pokretanju ili osnaživanju socijalnih usluga za OSI u zajednici i osobe s mentalnim poteškoćama ili inicijativama socijalnog poduzetništva kojima se predviđa direktno zapošljavanje OSI i osoba s mentalnim poteškoćama.

Sredstva iz ovog natječaja se mogu koristiti za nabavku pribora, opreme, obuka za rad, plaće, naknade, kao i renoviranje, u slučaju da se pokaže kako takva aktivnost direktno doprinosi ciljevima dodjele sredstava, itd.

Prijavitelji moraju biti u mogućnosti jamčiti održivost usluga ili poslovanja tijekom razdoblja za koje je odobrena potpora kao i razdoblja nakon okončanja potpore.

Financijska raspodjela

Ukupan iznos fonda za Bosnu i Hercegovinu iznosi 90.000,00 eura.

Maksimalan iznos dostupan za pojedinačne projektne prijedloge je 22.500,00 eura.

Prijavitelji moraju osigurati sufinansiranje od minimalno 10% sredstava (kao izravni financijski doprinos ili relevantnim doprinosima).

Vremenski okvir

- Objava natječaja za dodjelu sredstava: 23.12.2016
- Rok za dostavljanje projektnih prijedloga: **23.02.2017.**
- Procjena projektnih prijedloga do: 31.03.2017.
- Potpisivanje ugovora: 01.04 – 15.04.2017.

Više informacija i prijavnica: [SOCIETIES-NATJEČAJ SOCIETIES SOCIETIES-OBRAZAC ZA PRIJAVU](#)

U nastavku možete pronaći **Dodatak natječaju koji uključuje kriterije prijavitelja, aktivnosti, troškova, pojašnjeni postupak odabira, te odgovore na često postavljana pitanja: [Često postavljana pitanja SOCIETIES Dodatak na natječaj](#)**

Charles Stewart Mott Foundation (Fondacija Čarls Stjuart Mot)

Naziv programa:

Global Philanthropy and Nonprofit Sector (Globalni filantropski i neprofitni sektor)
Civil Society Program (Program civilnog društva)

Opšti ciljevi:

Cilj programa je podsticati društva u srednjoj i istočnoj Evropi te Rusiji, gdje ljudi i zajednice poštuju prava drugih i uspješno se angažuju u donošenju odluka koje utiču na politike i procese koji oblikuju njihove živote na lokalnom, nacionalnom i/ili međunarodnom nivou.

Charles Stewart Mott Foundation potvrđuje viziju svijeta osnivača u kojoj je svako od nas u saradnji sa ostatkom ljudskog roda – gdje je spojen kvalitet života svakog pojedinca sa dobrobiti zajednice, i lokalno i globalno.

Nastavljamo ovu viziju kroz kreativne dodjele finansijskih sredstava, pažljivu komunikaciju i druge aktivnosti koje poboljšavaju zajednice u svojim brojnim oblicima. Ista vizija zajedničkog učenja oblikuje našu unutrašnju kulturu, jer nastojimo zadržati etiku poštovanja, integritet i odgovornost. Fondacija nastoji ojačati, u ljudima i njihovim organizacijama, ono što je Mott nazvao “sposobnost postignuća”.

Koje aktivnosti se finansiraju:

Razvoj neprofitnog sektora i filantropije; građansko angažovanje i učešće javnosti; tranziciona pravda.

Globalni filantropski i neprofitni sektor

Ovo programsko područje nastoji potaknuti globalne platforme filantropije i neprofitnog sektora koji odgovaraju potrebama lokalnih zajednica.

Prioriteti finansiranja su:

- Želimo poboljšati učinkovitost filantropije i neprofitnih organizacija kroz međunarodnu saradnju i razmjenu znanja. Dajemo grantove:
 - Globalnim i regionalnim filantropskim i neprofitnim članskim udruženjima, podržavamo organizacije i inicijative.
 - Organizacijama i programima koji podržavaju globalnu filantropsku zajednicu.
- Ovo programsko područje nastoji potaknuti globalne platforme filantropije i neprofitnog sektora koji odgovaraju na potrebe lokalnih zajednica.

Civilno društvo

Program civilnog društva ima za cilj jačanje filantropije i neprofitnog sektora kao vitalnih pokretača povećanja građanskog angažmana i unapređenja zajednice i društva.

Dok su ciljevi i strategije Fondacije prilagođeni specifičnim okolnostima svakog geografskog područja u kojem radimo, dvije velike teme ujedinjuju dodjele grantova u sklopu programa:

- Kako osnažiti ljude i neprofitne organizacije da poduzmu kolektivnu akciju koja promovira i brani demokratske vrijednosti; i
- Promicanje i razvijanje robusnog privatnog davanja za opšte dobro.

Veličina donacije:

Prosjeck donacije je 100.000 USD. Iznos većine naših grantova je između 15.000 i 250.000 dolara godišnje. Trajanje projekta je minimalno dvije godine.

Geografsko područje podrške:

Više zemalja svijeta uključujući i BiH.

Kriterij podobnosti:

Svi budući kandidati treba da se informišu o misiji, oblasti djelovanja, geografskoj oblasti i raspoloživosti fonda Mott-a prije nego što uspostave početni kontakt.

Procedura za dodjelu sredstava obavlja se na više načina:

- Tražimo da organizacije sa kojima smo ostvarili kontakt dostave prijedloge projekata.
- Objavljujemo povremene pozive za prijedloge projekata (RFPs) koji se bave određenim problemima i oblastima.
- Primamo prijedloge projekata koji nisu posebno pozvani, ali koji spadaju u naše programske prioritete i koji su u skladu sa našim uputstvima.
- Obzirom da su sredstva fonda ograničena, posebno preporučujemo pisma interesovanja za one ideje i projekte koji nisu dostavljeni po pozivu. Pisma treba da sadrže kratak opis projekta, potrebna sredstva i vremenski period za realizaciju projekta.
- Razmatraće se prijedlozi za opštu podršku kao i prijedlozi posebnih projekata. Prihvataju se projekti koji traju jednu i više godina.

Prijedlozi projekata se trebaju dostaviti Fondaciji najmanje četiri mjeseca prije predloženog početka projekta.

Budžeti programa se dodjeljuju na osnovu kalendarske godine. Počevši u četvrtom tromjesečju svake godine osoblje će izdvojiti sredstva za projekte koje preporučuje za sljedeću kalendarsku godinu. Osoblje mora dovršiti sve preporuke za dodjelu grantova do 31. avgusta/kolovoza. Aplikacije se primaju tokom čitave godine, ali one zaprimljene između 1. septembra/rujna i 31. decembra/prosinca će biti uzete u obzir samo za sljedeću kalendarsku godinu.

Kako aplicirati:

Mott preferira da se organizacija prvo obrati [Pismom upita](#). Pismo treba opisati svrhu i ciljeve projekta, opštu metodologiju i ukupne troškove projekta. Pismo upita omogućuje programskom osoblju Fondacije odrediti relevantnost predloženog projekta u odnosu na programe Fondacije.

Kontakt:

Charles Stewart Mott Foundation

Gable House

18-24 Turnham Green Terrace

London W4 1QP

United Kingdom

Tel: +44 208 996 5052

Faks: +44 208 996 5181

Web stranica: <http://www.mott.org/>



USAID
OD AMERIČKOG NARODA

PROGRAM PODRŠKE MARGINAL
(PPMG)

Obavijest o javnom pozivu US State Departmenta za dostavljanje projektnih aplikacija (LGBTI) 2017

United States State Department uputio je poziv za prikupljanje pisanih projektnih prijedloga za male grantove iz LGBTI oblasti. Prijedloge mogu slati sve organizacije koje se na različite načine bave unaprjeđenjem ljudskih prava LGBTI osoba te društvenim i pravnim osnaživanjem LGBTI osoba.

US State Department prikuplja prijedloge projekata kako bi doprinio smanjenju diskriminacije ljudskih prava LGBTI osoba na osnovi rodnog identiteta, rodnog izričaja i spolne orijentacije.

Traženi iznos granta ne može biti veći od 25.000 USD za projekte u maksimalnom trajanju do 18 mjeseci.

Sve zainteresirane organizacije mogu popunjene aplikacije poslati do 24. februara, 2017 g. do 12.00 sati na email adresu: zahtjevi@ppmg.ba

Aplikacioni obrazac možete preuzeti [ovdje](#).



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar
Tuzla**

**Hadži Bakirbega Tuzlića 1
75000 Tuzla**

tel/fax: 035 258 077

**e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

WEB stranica Mreže:

www.omladina-bih.net

Mejling lista Mreže:

posta@omladina-bih.net

Webmaster:

emir.delalic@gmail.com